

2. Du vilain asnier

Il avint ja a Montpellier¹
c'un vilain estoit costumier
de fiens chargier et amasser
a deus asnes terre fumer.²
5 Un jor ot³ ses asnes chargez;
maintenant ne s'est atargiez:
el⁴ borc entra, ses asnes maine,
devant les chaçoit a grant paine;
souvent li estuet dire: "Hez!"
10 Tant a fait quë il est entrez⁵
dedenz la rue as espiciers.⁶
Li vallet batent les mortiers;
et quant il les espices sent,
qui li donast cent mars d'argent,⁷
15 ne marchast il avant un pas,
ainz chiet pasmez isnelepas
autresi con së il fust⁸ morz.⁹
Iluec fu granz li desconforz
des genz qui dient: "Dieu merci!"¹⁰
20 Vez de cest home qu'est morz ci!"
et ne sevent dire por quoi;
et li asne esturent¹¹ tuit quoi
enmi la rue volentiers,
quar l'asne n'est pas costumiers
25 d'aler, se l'en nes semonoit.

Un preudome¹² qu'iluec estoit,
qui en la rue avoit esté,
cele part vient, s'a demandé
as genz quë entor lui veoit.¹³
30 "Seignor,"¹⁴ fait il, "se nul voloit
a faire garir cest preudom,
gel gariroie¹⁵ por du son."¹⁶
Maintenant li dit un borgois:
"Garissiez le tot demenois!
35 Vint sous avrez de mes deniers."
Et cil respont: "Molt volentiers!"
Donc prant la forche qu'il portoit,

a quoi il ses asnes chaçoit,¹⁷
du fien a pris une palee,
40 si li au nes a aportee.
Quant cil sent du fiens la flairor
et perdi des herbes l'odor,
les elz oevre, s'est sus sailliz,
et dist quë il est toz gariz.
45 Molt en est liez et joie en a,¹⁸
et dit par iluec ne vendra
ja mais, së aillors puet passer.¹⁹
Et por ce vos vueil²⁰ ge monstret²¹
que cil fait e sens e mesure
50 qui d'orgueil se desennature:
ne se doit nus desnaturer.²²
Explicit du vilain asnier.